

11.05.2024

आकाशवाणी जयपुर—अजमेर  
प्रादेशिक समाचार

1850 बजे

- प्रदेश मांय पश्चिमी विक्षोभ रा असर रे बावजूद तेज गर्मी अर लू रो कोप—मौसम विभाग 14 मई ताँई आंधी—बारिश चालता रेहवण रा आसार जताया।
- ऊर्जा मंत्रालय भरोसो दिरायो—देश मांय उनाळा मांय जरूरत रे मुजब बिजली री पूर्ति जारी रेहवेला।
- आज राष्ट्रीय प्रौद्योगिकी दिवस मनायो जा रहयो है—मुख्यमंत्री देश ने मजबूत बणावण मांय लाग्योड़ा सगळा वैज्ञानिकां ने शुभकामनावां दीनी।
- आई.आर.सी.टी.सी. जातरुआं ने सात ज्योतिर्लिंग रा दर्शन करावण सारु एक जून ने जयपुर ऊं भारत गौरव ट्यूरिस्ट रेलगाड़ी चलावेला।

000

प्रदेश मांय पश्चिमी विक्षोभ रा असर रे बावजूद आज ई तेज गर्मी अर लू ऊं परेशानी व्ही। तेज गर्मी रो असर संवारे 11 बज्यां ऊं सिंज्या 7 बज्यां ताँई महसूस कर्यो जा रहयो है। म्हाणा झालावाड खबरनवीस बतायो के गर्मी मांय बधोतरी रे कारण पीवण रा पाणी री परेशानी आवण लागी है।

.....  
ई बीचे प्रशासन गर्मी ऊं साता देवण सारु लगातार कोशिश कर रहयो है। पाली मांय सड़कां माथे पाणी रो छिडकाव करी ज्यो। बाड़मेर मांय ढांढां—ढोरा सारु खेलियां मांय पाणी भरी ज्यो। राज्य मांय घणखर ठोडां पारो 41 ऊं 45 डिग्री सैलिंसयस बीचे दर्ज करी ज्यो। बीकानेर मांय सब ऊं बत्तो साढे 45 डिग्री सैलिंसयस तापमान दर्ज करी ज्यो।

000

पशुपालन विभाग जोरदार गर्मी ने ध्यान राखता थकां ढांढां—ढोरां री जरूरी सार—संभाळ री राय जारी कीनी है। महकमा रे मुजब तेज गर्मी ऊं ढांढा मांय पाणी री कमी, बुखार, सांस री गति मांय बधोतरी, दूध उत्पादन मांय कमी अर बच्चो गिर जावण समेत केई परेशानियां व्हे सके है। ई कारण जानवरां ने खुली अर हवादार ठोड़ माथे राखणा चाहिजे अर वां ने दिन मांय 4 दफा पाणी पिलावणो चाहिजे।

000

आज राष्ट्रीय प्रौद्योगिकी दिवस है। साल 1998 री 11 अर 13 मई ने जैसलमेर जिला रा पोकरण मांय खेतोलाई गांव कने दो परमाणु परीक्षण करी ज्या हा, जो कामयाब रहया। ई मिशन ने ऑपरेशन शक्ति नाम दियो ज्यो हो।

ओ परीक्षण मिसाइल मैन रा नाम ऊं पिछाण्या जावण वाळा पैली वाळा राष्ट्रपति डॉ. एपीजे अब्दुल कलाम री अगुवाई मांय करी ज्यो। ओ दिन देश री तकनीकी क्रांति रा तौर ऊं याद कर्यो जावे है। ई मौके मुख्यमंत्री भजनलाल शर्मा सोशल मीडिया संदेश रे जरिये भारत ने आधुनिक, विकसित अर मजबूत बणावण मांय लाग्योड़ा सगळा वैज्ञानिकां अर इंजीनियरां ने शुभकामनावां दीनी है। राष्ट्रीय प्रौद्योगिकी दिवस री पैली वाळी सिंज्यां रक्षा अनुसंधान अर विकास संगठन—डीआरडीओ कानी ऊं वां री न्यारी—न्यारी प्रयोगशालावां अर प्रतिष्ठानां मांय व्याख्यान अर भाषण रा कार्यक्रम राख्यी ज्यो। ई मौके रक्षा विज्ञान मंच (डीएसएफ) कानी ऊं दिल्ली मांय खास जळसो राख्यी ज्यो। जळसा मांय डीआरडीओ रा अध्यक्ष डॉ. समीर वी. कामत वैज्ञानिकां ऊं देश ने मजबूत अर खुद रे पाण ऊबो करण सारु नुवी तकनीक ईजात करण री अपील कीनी।

000

राज्य सरकार ई-फाइलिंग सिस्टम मांय प्रदेश रा 47 जिलां रा कलेक्टरां री रैंकिंग जारी कीनी है। रैंकिंग रपट रे मुजब नुवा बणायी ज्या जिलां रा कलेक्टर तेज गति ऊं फाइलां रो निपटारो कर रह्या है। सलूंबर रा जिला कलेक्टर सब ऊं तेजी ऊं हर फाइल 11 मिनट मांय निपटा रह्या है। लिस्ट मांय सलूंबर, शाहपुरा, व्यावर, केकड़ी, सांचौर, गंगापुर सिटी अर खैरथल-तिजारा बेहतरीन 10 जिलां मांय शामिल हैं।

000

जातरुआं ने सात ज्योतिर्लिंग रा दर्शन करावण सारू इंडियन रेलवे केटरिंग एंड टूरिज्म कॉरपोरेशन-आई.आर.सी.टी.सी. री ओर ऊं भारत गैरव टूरिस्ट ट्रेन चलायी जावेला। आ गाड़ी 1 जून ने जयपुर ऊं चाल र अजमेर, भीलवाड़ा, चित्तौड़गढ़ अर उदयपुर व्हेती थकां जावेला। 11 दिन रा ई सफर मांय जातरुआं ने द्वारिका, सोमनाथ, त्रयम्बकेश्वर, भीमाशंकर, घृष्णश्वर, महाकालेश्वर अर ओंकारेश्वर ज्योतिर्लिंग रा दर्शन कराया जावेला। ई सागे ई द्वारका अर द्वारकाधीश मिंदर देखण रो मौको ई मिलेला। आईआरसीटीसी रा संयुक्त महाप्रबंधक योगेंद्र सिंह गुर्जर बतायो के आ गाड़ी पूरी तरह वातानुकूलित व्हेला। ई बारा मांय और जाणकारी व्हाट्सएप नम्बर 90010-94705, 85959-30998 ऊं अर आई.आर.सी.टी.सी. री वेबसाइट ऊं हासिल करी जा सके हैं।

000

फौज रा तीन ई अंगां ने एक करण रा मकसद ऊं दूजो परिवर्तन चिंतन सम्मेलन नई दिल्ली मांय राख्यी ज्यो। प्रमुख रक्षा अध्यक्ष जनरल अनिल चौहान सम्मेलन री सदारत करता थकां कह्यो के एको करण री प्रक्रिया तेज व्हेवणी चाहिजे, ताकि फौज री समेकित दक्षता मांय बघोतरी व्हे सके। जनरल चौहान भरोसो जतायो के ई सम्मेलन ऊं देश री क्षेत्रीय अखंडता अर राष्ट्रीय संप्रभुता री बेहतर तरीका ऊं हिफाजत करण मांय मदद मिलेला।

000

जयपुर रा सेना कौशल प्रशिक्षण केंद्र री ओर ऊं प्रधानमंत्री कौशल विकास योजना रा तैत कोर्स रो दीक्षांत समारोह आज जयपुर मांय राख्यी ज्यो। ई मौके सप्त शक्ति कमांड री आर्मी वाइब्स एसोसिएशन री क्षेत्रीय अध्यक्ष कोमल सेठ 66 जणां ने सर्टिफिकेट दीना। सेना कौशल प्रशिक्षण केंद्र, जयपुर प्रधानमंत्री कौशल विकास योजना रा तैत राष्ट्रीय कौशल विकास निगम कानी ऊं मान्यता मिल्योड़ो नोडल केंद्र है जिण रा तैत तीन व्यावसायिक कोर्स चलाया जा रह्या है।

0000

जयपुर मांय रामबाग रा ट्रैफिक सिग्नल परां अब ट्रैफिक लाइट सागे पूरा खम्भा रे ई वां ई रंग रा व्हेवण री व्यवस्था करी ज्यी है, ई रा तैत ज्यी रंग री ट्रैफिक लाइट व्हेला, खम्भो ई वां ई रंग रो निजर आवेला। इण ऊं मोटर गाड़ियां चलावण वाळा ने दूर ऊं ही ट्रैफिक लाइट रो रंग निजर आ जावेला।

000

जन स्वास्थ्य अभियांत्रिकी विभाग री ओर ऊं बकायादारां ने साता देवण सारू एमनेस्टी योजना रा तहत बाकी प्रभार राशि जमा करावण परां व्याज अर पैनल्टी मांय छूट दी जा रही है। राज्य रा ग्राहक 31 मई तांई बाकी रकम एक मुश्त जमा करा र छूट ले सके है। छूट सगळी श्रेणियां रा ग्राहकां री 31 मार्च 2023 तांई री बाकियात माथे मिलेला।

000

आज विश्व प्रवासी पक्षी दिवस है। ओ दिन हर साल मई महीना रा दूजा थावर ने मनायो जावे है। इण रो मकसद प्रवासी परिंदां अर सरहद पार वां रा सफर ने बघावो देवणो है। ई मौके कोटा रा अभेड़ा बायोलॉजिकल पार्क मांय वन्य जीव विभाग री ओर ऊं परिंदा ने निरखण रो कार्यक्रम राख्यी ज्यो। ई दौरान लोगां ने दूजा देशां ऊं आवण वाळा प्रवासी परिंदा री जाणकारी दीरीजी। ई साल प्रवासी पक्षी दिवस री थीम “कीटों की रक्षा करे, पक्षियों की रक्षा करे” राख्यी ज्यी है। इण ने ध्यान राखता थकां कीड़ा रा महत्त्व रा बारा मांय जाग जगावण ऊं जुड़्या कार्यक्रम राख्यी ज्या।

000

नागौर जिला रा कुचेरा हलका मांय आज छीलरा गांव कने एक गाड़ी रे बेकाबू व्हे र रुंखड़ा ऊं टकरा र खाई मांय पड़ जावण रे कारण रह्या हादसा मांय दो जणा री मौत व्हे ग्यी। हादसां मांय एक महिला जख्मी व्हे ग्यी।

000

राजस्थान लोक सेवा आयोग री ओर ऊं सहायक आचार्य, पुस्तकालयाध्यक्ष अर शारीरिक प्रशिक्षण अनुदेशक परीक्षा, 2023 रा तैत 27 न्यारा—न्यारा ऐच्छिक विषयां री परीक्षा 16 ऊं 24 मई तांई अर 28 मई ऊं 2 जून तांई ली जावेला। परीक्षा दो पारियां मांय संवारे 9 ऊं दोपहरां 12 बज्यां तांई अर दोपहरां पाढे अढाई बज्यां ऊं सिंज्या साढे पांच बज्यां तांई व्हेला।

परीक्षा रा प्रवेश—पत्र आयोग री वेबसाइट अर एसएसओ पोर्टल माथे 13 मई ने जारी कर्या जावेला। उम्मीदवारां ने पहचान सारू परीक्षा केंद्र माथे आधार कार्ड री रंगीन फोटो ले जावणी व्हेला।

000

राजस्थान लोक सेवा आयोग सांख्यिकी अधिकारी— आयोजना विभाग आर्थिक एवं सांख्यिकी भर्ती परीक्षा रा तैत काउंसलिंग रे दौरान गैर— हाजिर रह्या उम्मीदवारां ने पात्रता जांच सारू एक और मौको दीनो है। अब आं ने 15 मई ने काउंसलिंग सारू आयोग रा दफ्तर मांय हाजिर व्हेवणो व्हेला। वरिष्ठ अध्यापक संस्कृत शिक्षा प्रतियोगी परीक्षा—2022 रा तैत जारी अतिरिक्त विचारित सूचियां मांय भेणा उम्मीदवारां री पात्रता जांच 13 ऊं 17 मई तांई करी जावेला। इण री विगतवार जाणकारी आयोग री वेबसाइट माथे मुहैया करा दीरीजी है।

000